

**Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisissaannut nr. xx-mut xx.xxxx 2004-meersumut siunnersuut.**

§ 1. Inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut pigisat ajoquserneratigut, inuussutissarsiordermi sakkugisat tammarnertigut imaluunniit napparsimanikkut imaluunniit allatut timikkut ajoquserluni sulisinnaajunnaarnikkut inuussutissarsiutiminnut tunngatillugu annaasaqarsimasunut taarsiissutitut Naalakkersuisut aallarteqqinnissamut tapiissuteqarsinnaapput.

*Imm. 2.* Pissutsini immikkut ittuni inunnut imm. 1-imi taaneqartunut silaannaap pissusiata kingunerisaanik, inuussutissarsiordernikkut nalinginnaasumik ajornartoornikkut assigisaasigulluunniit annaasanut taarsiissutitut aamma Naalakkersuisut aallarteqqinnissamut tapiissuteqarsinnaapput.

§ 2. Aallarteqqinnissamut tapiissutit tunniunneqarnissaannut patsisissanngortinneqarsinnaavoq ajoquserneq, annaasaqarneq, napparsimaneq imaluunniit sulisinnaajunnaarneq matuneqarsinnaangereernersoq, matuneqarsinnaanersorluunniit, nammineerluni sillimmassutitigut pisortalluunniit sillimmasiinerisigut imaluunniit namminersortut pisortalluunniit tapiissutigisartagaasigut assigisaasigulluunniit.

§ 3. Aallarteqqinnissamut tapiissutinik qinnuteqaat Naalakkersuisunut tunniunneqassaaq.

*Imm. 2.* Imm. 1 malillugu qinnuteqarneq pissaaq Naalakkersuisunit suliarineqarsimasooq qinnuteqarnermut immersugassaq atorlugu.

*Imm. 3.* Imm. 1 malillugu qinnuteqaammut ilanngunneqassapput qinnuteqartup aningaasatigut inissismaneranut uppernarsaatit kiisalu inuussutissarsiordermut atasumik pigisat ajoqusernerannut, annaasaqarnermut, napparsimaneremut allatulluunniit timikkut ajoqusernikkut sulisinnaajunnaarnermut uppernarsaatit.

*Imm. 4.* Aallarteqqinnissamut tapiissutit tunniunneqartassapput sapinngisamik soqutigisaqaqatigiit kattuffiat susassaartoq tusarniaavigereerlugu. Pissutsini § 1, imm. 2-mi aamma § 4, imm. 2-mi taaneqartuni soqutigisaqaqatigiit kattuffiat tusarniaavigineqartassaaq.

§ 4. Aallarteqqinnissamut tapiissutit ataasiaannarluni ikiorsiissutigineqartarput minnerpaamik 2.000 kruuninik annerpaamillu 25.000 kruuninik.

*Imm. 2.* Pissutsini immikkut ittuni Naalakkersuisut imm. 1-imi taaneqartunit amerlanerusunik tunniussisinnaapput.

*Imm. 3.* Naalakkersuisut aallarteqqinnissamut tapiissutit tunniunneqarnerannut tunngavissaatissinnaavaat qinnuteqartup kingornatigut tapiissutit atorneqarnerat pillugu nassuiaateqarnissaa.

**§ 5.** Naalakkersuisut aallarteqqinnissamut tapiissutit utertillugit akilerneqarnissaat piumasarisinnaavaat imaattoqarpat:

- 1) Inuk aallarteqqinnissamut tapiiffigineqartoq kingusinnerusukkut taarsiivigineqarpat, tapiiffigineqarpat allatulluunniit inatsisartut inatsisaat manna malillugu siunertamut taamaaqataanut tapiissutitut matussutissinneqarsimappat.
- 2) Inatsisartut inatsisaat manna malillugu piginnaatitaaffiginngisaminut tapiiffigineqarsimappat.

*Imm. 2.* Inuk aallartitseqqinnissamut tapiiffigineqarsimasoq pisussaavoq Naalakkersuisunut nalunaarutigissallugit pissutsit atugarisami allanngorneri, taakkua kingunerisinnaallugu Naalakkersuisut, tak. imm. 1, aalajangersinnaallugu aallarteqqinnissamut tapiissutit utertillugit akileqqunissaat.

**§ 6.** Inatsisartut inatsisaat manna naapertorlugu akissaajaatit Landskassimit akilerneqassapput.

**§ 7.** Inatsit atortuulissaaq ulloq 1. juli 2004-mi.

*Namminersornerullutik Oqartussat, ulloq xx.xxxx 2004.*

*Hans Enoksen*

/

Simon Olsen